

摘藻堂四庫全書薈要

集部

欽定四庫全書叢要

集部

明詩綜卷二十八

詳校官編修

臣

王天祿



欽定四庫全書薈要卷二萬五百一

集部

明詩綜卷二十八

翰林院檢討朱彝尊編

悅六首

悅字民懌常熟人舉成化乙酉鄉試除泰和訓

導遷長沙通判調柳州有思玄集

王元美云桑民懌如洛陽

博徒家無擔石一擲百萬

胡元瑞云民懌高

自矜詡其詩體格卑弱可謂大言無當

俞汝

成云思玄居士負氣自高凌厲一世其詩賦類多率情有詭世自嘲之意可以資暇啓顏者亦

復不
少

靜志居詩話民懌說易謂萬物莫逃乎數說詩
謂刪後無詩率本堯夫之餘唾其於律呂亦拾
蔡氏之陳言才識平平爾乃敢大言述道統論
則曰夫子傳之我作學以至聖人論則曰我去
而夫子來居然以孟子自況而非薄韓子比其
文於小兒號嘆其在長沙著庸言自詡窮究天
人之際非儒者所知而曰吾詩根於太極天以
高之地以下之山以峙之水以流之庶物以飛
潛動植之日月宣其明雷霆發其震雨露播其
潤澤散之則同元氣流行收之於心發之於言
被之管絃則可感天地動鬼神乾坤毀日月息
詩迺收聲復歸太極其言大而夸狂也幾於悖
矣

感懷

逝日不可追誰能駐光景春陽媚花草荏苒歲華冷威
鳳德未成颯立丹山頂路逢清泠泉徘徊照孤影

東園有奇花容姿鮮灼灼雖是春風開亦是春風落甘
霖被郊原蔓草輕蘭葍所以高岡松無言倚寥廓

住龍福寺

龍福山虎形有寺枕山陲僧衆暗吞噬一二留披緇

自注

形家言
如此

法堂久欹傾羅漢無完肌空階劃鳥跡香案縈

蛛絲我了催科業僧榻苦栖遲月黑響蝙蝠風定聞狐
狸微官責聚斂百賦皆有期長沙病逋負此州更難醫
譬如理亂髮恐傷首中皮膏油漸浸潤緩緩施梳篦審
知曠厥職恬退乃其宜妻孥先遣發岳麓不日辭幸逢
中丞賢加禮免鞭笞言語如春溫勉令撫瘡痍徘徊不
忍去我亦為我嗤憶昔少年日許國師皋伊豈知坐冗
職出納伍有司與民算升斗瑣屑誠堪悲登山拜虞舜
臨淵弔湘纍終當拂衣去涕洟陳吾詞

題鳳洲草堂效吳體

江水四面圍高丘草堂結在丘山頭頻經春雨打不漏
苦耐秋風吹未休枕邊驚聞櫓聲過檻外俯看雲影浮
我約吳郎來借住并吞沙草占溪鷗

過十二磯

在梧
州

亂石危磯急瀨聲扁舟汎汎水中萍月當秋夜十分白
天到遐荒一倍青引路哨船鳴鼓吹前山軍堡出旗旌
回頭便有開懷處無數峰巒列翠屏

題畫

浮雲出沒吞遙岑
小亭日日巢秋陰
美人如玉不可見
松子自落空山深

懷遠道中

蓬蒿沒馬路
通身在野真
為草莽臣
莫道先生無武備
前驅負弩盡
徇人

文洪三首

洪宇功大長洲人
成化乙酉舉人
署涑水儒學

教諭有括囊藁

詩話長洲文氏世載其德希素先生實始之句
如野猿窺落果林蝶戀殘花自得翻書趣渾忘
對客言饒有恬澹之致傳之交
木甫田高曾之規矩不改也

睡起

寂寞掩林扉東風盡方永睡起落紅多斜陽半樓影

南行舟中

露白沙涼月滿空雁聲歷歷度西風客程尚與鄉關近
歸夢如何便不同

訪徐尚容

虎谿谿上草堂閒
千樹江梅香藹間
欲向南枝問消息
東風吹我過西山

羅倫一首

倫字彝正永豐人成化丙戌賜進士第一授翰林修撰坐論事貶泉州市舶副提舉尋召還復職改南京有一峰集

詩話一峰以論南陽奪情事謫廣東市舶副提舉實學士陳文所畫策也久之復官南陽已謝

世既而文死薛御史之綱作詩誚之曰九原若
見南陽李為道羅倫已復官然李公賢相贊裕
陵釋建庶人居之鳳陽許其自便即此一事啓
沃已多亦未可輕訾也一峰專心理學詩不與
韻士爭長而集中紀夢詩多
至三百餘首難乎免於癖矣

節婦歌

泉流不歸山雨落不上天妾心死不回金石無其堅白
日經中天飄忽沈西海妾心日不如瞳瞳光不改明月
揚清輝三五二八圓又虧妾心月不如耿耿無虧時憶
妾二十春結髮事良人安知三載後羅帷生素塵懷中

五歲兒零落重悲辛吾聞陳孝婦夫死養姑心愈固朱
幡入奏丹書來黃金北斗高門戶又聞杞梁妻慟哭梁
山傾精神變天地黃土非無情妾髮可剪妾頭可截妾
心之白不可涅

詩話一峰節婦歌初不詳姓氏別本或加張字或以為節婦甄氏作誤也詞亦小異

程敏政九首

敏政字克勤休寧人成化丙戌賜進士第二授
翰林編修進左春坊左諭德兼侍講歷詹事府

少詹事兼翰林侍讀學士掌院事遷禮部右侍

郎卒贈尚書有篁墩正續稿

李時遠云篁墩著述甚富體格不高

詩話篁墩數與西崖酬和集中存詩數千究乏警策至其緝錄諸書若明文衡新安文獻志甄綜有法餘如宋紀受終考宋遺民錄皆有功史學獨是議孔廟祀典而屏鄭康成不與未免過於刻薄若夫蘓氏檮杌一編謂眉山父子罪浮於王安石蓋借文公雜學辨而周內之其意第欲為伊川復讐不知徒貽有識者笑也

懷平江伯陳恭襄公

赴赴陳將軍平江始開國小年八石弓勇氣屢破賊竭

逢中興主得附昇雲翼當宁念豐鎬京邑望南北安得
蕭與韓晏歲足兵食將軍家合肥老大諳稼穡一朝被
簡知舞蹈奉明勅建牙淮水陽諸路盡承式孜孜竭衆
智疏鑿靡餘力厥庾便交輓隄牐濟危嗇艘舸隨淺深
湖灞幾通塞百年民力蘓萬里海濤息居然奠東南不
復困供億將軍去幾時寢廟見顏色火旗與雲馬夜下
不可測父老說遺事往往動遐憶征夫多苦辛國本在
培植賢孫今代將當復守成則東風吹客衣清口日初

吳公忠夙所欽再拜續銘刻

蹋車行

田夫蹋車如蹋弩田婦蹋車心更苦
老天不雨將奈何稻隴看看作焦土
我行見此三歎息欲助農忙恨無力
假令一旱似往年豈獨憂貧復憂賊
我雖七尺金紫身聖恩許作歸耕人
詩書不了餬口計與爾將來同苦辛
擊鼓揚旗禱神福且莫先憂食無粥
賢侯恤民天所憐好雨時來歲還熟

功臣廟下作

雞鳴山側英雄坊朱門半掩青松長功臣廟食自洪武
下車進謁開中堂元勲佐命推六王儼然並坐徐與常
左李右鄧沐最少霜鬢獨見東甌湯秉圭服冕垂衣裳
異姓聯翩如雁行公侯十六分兩傍金貂玉帶相輝光
辦香一炷三歎息却走苔堦觀畫廊謁從真主興濠梁
長江飛渡入建康血戰往往皆鷹揚當時陳寇號最強
諸軍一劔番水陽不日降旗來武昌神威自此若破竹

僭竊次第歸天亡按圖未取東海方下令先縛鹽城張
遠清閩廣服蠻徼繼下滇蜀連氏羌東南略遣瘡痍息
幽燕直北消欃槍妖氛淨掃奠八荒乾坤一統成帝鄉
九州入貢紛梯航文孫繼承萬億載諸將之功何可忘
禮官四時奉蒸嘗令典與國同無疆摩挲丹青落日黃
一時際遇思明良陸機有頌媿莫續風雲颯爽天茫茫
暮雨野泊

黑風摧山雨如注未到下邳無泊處暗中雜還人語聲

且逐淮南漕舟住淮南漕舟三百強粉字舵樓成堵墻
輪更轉箭鎮相續似覺人人嫌夜長滅燭悠然倚牀坐
遠村曙雞聞一箇前途早有役夫來岸東相呼岸西和
送黃欽都閩出守洮河岷三州

前歲平遼過海東今年分陝駐湟中三城斥堠提封遠
千里蕃戎節制通開府欲施經濟策留屯先上便宜功
從來禦侮須才俊莫向沙場歎轉蓬

度東山嶺

石橋駐馬問田翁一塢深深隔樹東
帝子閣前沙似粟
埜神祠下路如弓
疎松古磴風微動
細草陰厓雪半融
回望紅塵才數里
不知身在亂山中

海子

十里城陰道西湖一派分
秋晴沙岸尾時見白鷗羣
送克寬弟南還至茶菴獨歸

垂野陰雲一望迷
送行愁問路東西不知幾日黃梅雨
門外青泥沒馬蹄

題小景雜畫

綠樹蕭然蔭草亭
酒船安近蓼花汀
分明一夜溪頭雨
洗出春山數點青

莊景五首

景字孔暘江浦人成化丙戌進士改庶吉士授
簡討以諫謫桂陽判官遷南京行人司副終南

京吏部郎中天啓初追謚文節有定山集

李世賢云

定山詩好用乾坤字

楊用修云定山早有詩名頗有絕可笑者如太極圖兒大先生帽子高

贈我一壺陶靖節還他兩首邵堯夫又贈我兩
包陳福建還他一匹好南京聞者捧腹然晚年
詩入細竟有可並唐人者 俞汝成云莊定山
詩雖不步武唐人而去時調則遠 王元美云
莊孔暘佳處不必言惡處
如村巫降神里老罵坐

詩話湯義仍好填詞人或勸之講學湯云僕終
身言之顧諸公勿省耳諸公所講者性僕所言
者情也 旨哉言乎自昔衮衣陳詩章甫雅言昔
之聖賢類不廢詩至曰女心傷悲殆及公子同
歸又曰其新孔嘉其舊如之何抑何其婉曲入
情也自堯夫擊壤而後講學毋復言詩言詩輒
祖堯夫遂若理學風雅不並立者然一峰康齋
白沙定山咸本擊壤而定山尤甚所謂太極圖
兒大先生帽子高等句不一而足以是為詩其
去張打油胡釘鉸無幾矣甘泉從而輯之以詔

學者謂非此則與道學遠也然則打油釘鉸反為近道之言而詩三百篇春女秋士之思皆可置勿錄也竊為理學諸先生不取也

憶舍弟

天邊聞一雁杳杳向南徂
今夜西風冷他鄉小弟孤
五
人千里去九月一書無
欲作千行淚憑誰寄客途

題畫

遙山青兩峰老樹紅一葉
我懷不可羈月明江獨涉
一作

空江下
明月

送博羅何孝子

白酒江門暖北來風正寒
釀方君不錄明日寄書難

釣魚圖

溪上春雲與浪飛
溪頭春水鯊魚肥
野人只是閒無事
日出船來月出歸

寄壽州廖同知

江鄉煙景不須爭
客裏風花亦有情
我見白頭張汝弼
今年又在壽春城

黃仲昭一首

仲昭名潛以字行莆田人成化丙戌進士改庶
吉士授編修坐諫鰲山煙火予杖謫湘潭知縣
遷南京大理評事進寺副乞休弘治初起江西

提學僉事尋致仕有未軒集

劉玉執云先生遺文闡諸理者微微

諸事者核模寫窮物象之真吟咏得性情之正

詩話僉事以詞臣建言宜有巖巖氣象而詩特和易近人其謫居寫懷也有云一片歸心留不住非因故國有尊鱸其歸田雜咏也有云悔殺昔年成底事紅塵鞭馬聽朝鐘其澹於世味也

可見已初自號未軒羅彞正謂曰君之未余知之吾道未至於孔孟吾功未至於伊周吾民未至於唐虞君之未也若士未大夫大夫未公卿則衆人之未也晚居下皋築俱樂部亭更號退巖居士云

明妃詞

風起龍堆滿面沙
舉頭何處望中華
早知身被丹青誤
但嫁巫山百姓家

章懋一首

懋字德懋蘭谿人
成化丙戌進士累官南京禮

部尚書贈太子少保諡文懿有楓山集

詩話楓山自言不工於詩故集中存者甚少嘗見思陵御書一幅詩云未央鐘動曙光生隱隱初聞柳外鶯風靜御爐香篆細日高斧座袞衣明塙頭陞擁黃麾杖豹尾班聯白玉珩最喜及時勤庶政蒼蠅聲裏聽雞鳴真跡存高上舍佑鉉處觀者疑爲思陵御製實楓山集中詩也惟及時二字集本作君王御筆更之是楓山一集曾歸乙夜之覽矣附識於此以當開寶舊事

遊牛首山和沈仲律韻

乘興來山寺清尊共解顏
院深春晝永香裊午風閒
短屐行應遍危欄倦亦攀
白雲飛不定何處是鄉關

張弼十首

弼字汝弼松江華亭人成化丙戌進士授兵部

主事轉員外出知南安府有鶴城東海二橐李

之云東海詩清鍊脫俗力追古作其自評書不

如詩詩不如文此英雄欺人不足信也

王濟

之云東海詩不苟作必超詣豪宕擺脫近世

尋常語

王子衡云先生詩氣豪而逸發乎性

情之正

詩話汝弼詩云酒杯不及陶彭澤詩法將隨陸
放翁故其律體全學劍南如魚兒浦口酒船小
燕子風前茶焙香酒遇故人隨量飲花當好處
及時看自從都下三年別不寄江東一紙書孤

艇夕陽荷葉亂小樓春雨杏花殷鬢毛零落風
前鷺心緒悠揚簇上簷一頃新田收晚稻數椽
茅屋補秋蘿浪花作雨汀煙濕沙鳥迎人水氣
醒萋萋芳草日將暮點點飛花春可憐漂水入
春冰半黑平山消雪草微青西飛白日忙於我
南去青山冷笑人草露松風千里夢秋霜春雨
百年心僧中今見大小朗世上爭傳長短歌霍
光有傳何曾讀疏廣無金亦自歸可稱具體與
定山輩專微擊壤者不同也

紅梅贈翁僉事

庾嶺小紅梅風標天下絕昨日幸同歡今日傷離別玉
遂兩三聲吹落胭脂雪寫以贈知心相攜共明月

咏竹

擊節歌離騷湘靈招不得開門看月明幽篁倚蒼石春
風千萬花花落春無跡此君冷淡姿常有好顏色

假髻曲

東家美人髮委地辛苦朝朝理高髻西家美人髮及肩
買妝假髻亦峨然金釵寶鈿圍朱翠眼底何人辨真偽
天桃窻下來春風假髻美人歸上公

宜興好寄弋陽尹李端卿兼東諸公

吳中山水宜興好曾在京華得飽聞踪跡十年嗟未到
風煙一壑要平分筍饒茶塢銅官雨荷蓋蘭舟并剡雲
更問東坡田可贖便教兒子蚤耕耘

棠溪景

悠悠下村路望望皆煙樹何處讀書聲山禽忽飛去

送張維亨之沂州

瑯琊臺下看新晴聽得陽關第四聲千樹梅花滿城雪
也應難比使君清

俞舜卿僉憲許柑未送詩以促之

南海黃柑未見分
舉杯空望嶺頭雲
元宵燈火相將近
空手歸來惱細君

絕句

空濛山色晴還雨
繚繞溪流直又斜
短杖微吟過橋去
東風滿路紫藤花

方文美畫

花落春歸客未歸
仲宣樓上倚斜暉
故園遙在三江外

綠遍靡蕪燕子飛

題畫

雲杉如薺屋如蚶
詰曲溪流瀉碧潭
獨立小橋吟不盡
插天晴翠太湖南

賀欽一首

欽字克恭廣寧人
成化丙戌進士官
給事中天啓初追
謚恭定有醫問先
生集

春晚

落盡羣芳枝已空
游人枉自怨東風
誰知寂寞幽園裏
猶著楸花一樹紅

林 瀚一首

瀚字亨大閩縣人成化丙戌進士歷官南京吏部尚書贈太子太保謚文安有泉山集

詩話文安公父元美中永樂辛丑進士仕至撫州守以循良聞公有子九人康懿文禧官皆至尚書諸孫為尚書者復二人其他階大夫郎者不數焉門閥可云盛矣公嫺於制舉藝吾鄉姚處士澐哀集明一代時文三百八十家特推公為之首詩不耐深思然一門濟濟儒雅風流不

特三世五尚
書有集而已

寄鄭郎中

鳳臺一別四經秋
羨子投閒未白頭
為問濂江江上路
幾人煙雨櫂歸舟

李傑十五首

傑字世賢常熟人
成化丙戌進士
改庶吉士授
編修累官禮部尚書
贈太子太保諡文安
有石

城山房橐

胡世高云
宗伯詩文明暢醇雅渾厚
和平悉從經學流出
未嘗為鈎棘詭

亢之言以驚世取譽
自然從容於槩度中

詩話張乖崖詩云獨恨太平無一事江南閒殺
老尚書虞山李文安以忤劉瑾致政歸築逸我
堂壘石為山暇游昆尚二湖賦詩云虞山山下
是吾廬三載棲遲得自如却怪四方多事日江
南閒殺老尚書蓋其時山東江西四川湖廣盜
賊並起故為是言也文安不以詩名然與李文
正吳文定諸公酬和不輟其自序云余於詩文
初無師授亦未嘗規倣古人將以是名世但竊
祿詞垣公私所需不容已爾故意之所到信筆
書之未嘗刻苦思索必求其工也可謂得失寸
心知
矣

早行舟中有作

荒雞一再號東方漸生白衆星尚駢羅天宇黯以黑晨
光正蒙昧莫辨河山色舟行趁潮長寧費牽挽力蘆汀
雁驚起鳴聲何唳唳輕颺拂涯樹涼露時一滴前村燈
火明茆屋疎林隔蓬窻攬衣坐悠然忘盥櫛宵征自可
怡此景更奇特

登泰山絕頂

五嶽鎮坤維其東雄泰岱巖巖一何高屹立霄漢外神
靈所攸鍾秩祀宜萬代我來屬深秋登陟覽勝概雲開

旭日升峰巒新染黛盤盤上澗谷石磴豁復隘涼飈起
虛谷颯颯響靈籟兩崖戢霜樹爛斑殊可愛五松非秦
封亦已類偃蓋躋攀入天門縹緲凌上界睇盼感廢興
喟然發長嘅七十二帝王封禪遺跡在玉檢時復出厓
礪亦殘壞茲山自今古直與穹壤配絕頂氣益清衣袂
浮沆瀣羣山紛後從厯厯同聚塊中原小如甌滄海縈
若帶置身九重近誰謂天下大吾言良匪誇聊以志一
快

泰山竹林寺與陳大叅楊僉憲同遊

陟險千萬盤未識寺門處一澗委蛇來齒齒亂石聚飛
梁忽橫亘清泉下奔注其間有靈湫蛟龍所蟠據時經
不測谿心動髮毛豎肩輿尺寸進僕夫汗如雨我欲飛
步登厓傾足難駐青鞵與布襪惜不攜此具貪竒不知
止竟忘垂堂慮緬懷得一樂未足償千懼峰回見林薄
飄然發佳趣古殿三兩楹滿庭陰高樹百果經秋霜甘
美皆可茹同行得二妙把酒勸酬屢酒酣陟嶺岼翼與

仙靈遇高寒覺衣單俯視飛鳥去白雲出巖阿英英若
春絮登臨興無限日暮歸何遽摹寫詎能窮率爾成短
句

秋崖

秋山鬱岌巖懸崖削如壁自非插羽翰可望不可即若
人何好奇捫蘿每登陟濕雲潤我衣落葉墮我幘逍遙
空青外似與塵世隔便欲御冷風飛行覽八極

題王孟端松泉圖次饒介之松濤韻

山椒怪石蹲如羝松崖巉巖不可梯蒼濤洶湧翻地軸
白日晦冥天為低高枝棲鶻巢欲墮哀鳴何處求其雌
初疑龍蛇相格鬪鱗鬣無乃多傷夷又疑羣仙互來往
翠旌羽節紛祁祁影作大陰連巨壑根蟠絕澗滋寒漪
何人圖此心獨苦九龍山人揮灑之筆端生意妙莫測
真宰上訴天應悲驚風颯若坐間起毛骨凜凜難禁吹
林泉逸趣我所嗜相對不覺心神馳世間真假俱一夢
以夢非夢良亦癡卧遊何必謝公屐千峰遍閱消移時

畢韋一去藝中絕後代未聞工者誰山人能事寧止此
布衣上結明主知圖窮載誦醉漁作此翁胸次亦已奇
歌聲悲壯意超脫不似杜老憂時危豈期兩美偶相合
有聲之畫無聲辭百年勝賞不易得俛仰忽復令人思
雪泥鴻爪宛然在風流雲往何由追後來視今今視昔
揮毫試和松濤詩

題謝廷循山水

峰高遲出日山氣曉氤氲葉潤林藏霧崖分谷吐雲客

衣晴亦濕瀑響遠逾聞茅屋依深樾逃虛羨隱君

遊靈谷次鄭司徒韻

吾愛山中筍蕨甜山靈况復不吾嫌日華濃染緋桃色
雲影輕籠翠柏尖尊酒興催詩興發管絃聲與鳥聲兼
韶光滿眼供春望分付奚奴為卷簾

過蔡村

白沙灘接綠楊堤遍野青黃麥秀齊萬雉都城天咫尺
幾家村落水東西濛濛細雨來帆重漠漠平蕪去鳥低

岐路年年成底事
遣懷只合醉如泥

奉祀天壽山

有序

五月十三日上以亢旱命臣傑祭告天壽山之
神晚至昌平雷雨忽作次日四鼓祀畢出陵月
色如畫歸至沙河回望西北諸山雲氣變隼流
水已沒斷橋矣十六日京師雨十七日大雨畿
甸霑足賦詩志之

玄雲四合雨傾盆
朝野歡騰頌至尊
已藉靈祇通上帝

自應烈祖祐神孫禾苗漸發高低壠草樹重榮遠近村
猶記昨宵祠禱罷滿山明月照陵門

孔廟紀事次西涯李閣老韻

至聖由天縱斯人足典刑道高王只素文在簡猶青秩
祀從先代尊榮合萬齡廟堂森穆穆金碧煥熒熒回祿
噓妖沴炎光迫紫冥忽驚空邃宇倏已及前庭古壁殘
遺冊穹碑剝舊銘蒼煙隨燼滅焦塹逐風零寧記諸賢
像誰摹老櫓形衣冠猶在望絲竹杳難聽驛報來東郡

封章入大廷聖情深隱惻睿旨重叮嚀祭告誠宜達趨
跼職所丁瞻依懷闕里對越想英靈大宅門牆峻高林
艸木馨尼山遙可覩泗水近須經衣露常沾潤帆風渺
御泠郵程占夜月征旆帶晨星傳詔修香幣騰書具鼎
鉶絕芽行漢禮作器象周型祭統寧教墜天機自不停
春陽發壇杏和氣長階奠揆日營新制推波濯燄腥巖
巖增壯觀翼翼閤重局儒道今滋盛文風被八溟

題扇

竹徑清陰合行行路欲迷仙家何處是只在石橋西

雜興

花霧曉濛濛落紅飛不起文采雙鴛鴦蕩漾綠池水

次徐文量主事韻

西風獵獵走驚沙歲晏登臨倍憶家爭似南州徐孺子
寒林匹馬看梅花

謝鄭東園惠荔枝用原韻

閩中佳品數方紅蜜漬鹽蒸恐未工曾聽詞林前輩說

岳李
方 葡萄風味略相同

題倪雲林竹

倚風寒翠不禁吹
秋盡瀟湘暮雨時
極目蒼梧魂欲斷
隔江休唱竹枝詞

徐恪一首

恪字公肅常熟人
成化丙戌進士累官南京工部右侍郎

朱仙鎮岳王祠

汴洛淒涼寢廟空
中原恢復仗英雄
黃龍未遂長驅志
鐵馬猶傳轉戰功
貔虎散歸烽戍老
河山遺恨古今同
西風一掬懷賢淚
灑向荒祠夕照中

陸容一首

容字文量太倉州人
成化丙戌進士授南京吏部主事
改兵部坐言事出為浙江右叅政有式齋集

詩話叅政與張亨父陸鼎儀齊名號婁東三鳳
詩皆非所長式齋則至登第後始為之見所述

菽園雜記若其藏書之富見聞之
周洽似非亨父鼎儀所能及也

感遇

松株青鬱鬱冬夏不改顏園工徇時好移栽盆盎間屈
為虬龍形束縛苦不閒豈無培養恩適性良獨難吁嗟
梁棟材誤作花艸看愛之不以道何如老空山

戴縉一首

縉南海人成化丙戌進士累官工部尚書

楚江旅懷

薄暮過瀟湘秋空楚水長黃蘆千里月紅葉萬山霜客
夢懸雙闕鄉心逐五羊羈情誰與晤勞者若為傷

韓文二首

文字貫道洪洞人成化丙戌進士累官太子太
保戶部尚書贈太傅諡忠定有質菴存藁何粹夫云

先生詩溫如春風清如流水險韻賡和至數十
首而句穩意新無牽強重累之病如層濤疊浪
可喜可愕而無一不出於自然

詩話忠定公餘即事吟咏集中十
九皆七言近體取自怡悅而已

西藍禪院

西藍禪院夕陽開古殿碑殘畫雜苔霜冷松林無鳥宿
月明竹徑有僧來霍山東抱諸峰合汾水西流九曲迴
老去未忘憂國念浮雲直北望燕臺

羅漢院

寺近孤村路轉西小橋流水夕陽低經霜崖果猿偷摘
欲暮風林鳥亂栖蛭粉尚留題壁字香灰半入種花泥
箇中老衲耽幽寂不為登山不渡溪

陸淵之一首

淵之字克深上虞人成化丙戌進士歷官布政使有東皋集

黃鶴樓

落日江流帶女牆飛樓百尺俯蒼茫
筵前却怪當年事鸚鵡何緣到楚鄉

潘蕃一首

蕃字廷芳崇德人成化丙戌進士累官南京刑

部尚書

詩話尚書數歷中外於蜀於粵屢立戰功以忤
劉瑾被逮與劉忠宣同戍甘肅瑾誅復官優游
林下簡朴如貧士時人為之詩曰尚書歸來無
第宅稅地種花兼種魚舉網打魚魚換酒花前
醉倒老尚書

吳越戰場

吳越興亡宛目前游屯涇上艸芊芊夕陽滿地生寒色
野燒緣溪斷暮煙麋鹿歌臺今往矣鷓鴣舞殿亦淒然
祇餘賜劍當年恨惆悵東風哭杜鵑

顏瑄 三首

瑄字寶之江陰人成化丙戌進士官戶部主事

有一菴詩抄

詩話寶之賦才捷敏嘗即內兄夏希明座上令侍女喬妙福捧硯王碧雲展紙和香山琵琶行韻援筆成篇不竄一字詩多穠縟七律頗近錢郎

過沛縣

獨坐蓬窻對月明靜聞譙鼓已三更舟將泊處聞人語
驛未臨時見吏迎泗水亭前荒草遍歌風臺上宿雲平

英雄回首今何在撫景空懸萬古情

登鳳凰臺作

鳳凰臺上雨初收天際涼雲拂地流
萬里關河明落照九重宮闕動高秋
青山近遶城頭路紅樹深藏驛外樓
莫怪臨歧重惆悵青袍三載此淹留

宿河西務

漠漠煙光漸欲昏人家一半掩柴門
鼓聲近報沙邊驛帆影遙連郭外村
紅斂夕陽微有迹綠浮春水淨無痕

怪來野趣難消遣自倚蓬窗勸酒尊

樊阜三首

阜字時登縉雲人成化戊子舉人官延平儒學訓導有樊山摘橐

詩話括蒼山壤風雅之士寥寥獨縉雲樊氏門才頗盛時登而外曰敬公慎曰叙公倫曰源時濟曰通時亨曰昌永盛曰甫永美曰貴永芳曰鐸伯廣皆能詩叙有用拙橐源有竹軒橐昌有友菊詩甫有硯櫟集貴有桂岡集鐸有畏齋存橐惜乎流傳者寡矣

田間雜咏

烏柏陰我墻白茅覆我屋荷篠朝出耘依依暮歸宿少
婦勤織縫諸孫解樵牧秋風禾黍收寒日照原陸鳥雀
啾啾鳴園籬多草木官租及早償莫待里胥督

灣河舟中呈鄭廷韶吳景端

朝發燕山陽暮宿灣河側高樹蔚繁陰浮雲淡無色
彼西日馳憂心恒惻惻賴我同心人相期崇令德

馮公嶺道中書所見

馮公今去久嶺路至今聞紅樹邨邨雨青山片片雲野

橋松板架巖溜竹筒分日落人行少時參鹿豕羣

張昇一首

昇字啓昭南城人成化己丑賜進士第一累官
太子太保禮部尚書贈太子太傅謚文僖有柏
崖集

渡淮

長淮一道入滄溟滾滾黃流若建瓴回首故鄉何處是
春風多少短長亭

屠 勲二首

勲字元勲平湖人成化己丑進士累官刑部尚

書加太子太保贈太保謚康僖有太和堂集

揚應

寧云屠公屢更劇曹手不釋卷與余為文字
交居嘗過從必有倡和辭章之名播於中外

詩話吾鄉先生若呂文懿有子秉之屠康僖有
子文升詩名皆勝其父然兩公韻語亦自成家

屠集如浦樹遠分揚子渡江風吹過石頭城吟
看雁影秋來早坐聽潮聲月上遲夢裏只疑身
有翼燈前未信眼生花江湖路遠身仍健天地
思深罪亦宜
鷗山腰樓閣天低樹江上人家水拍城八韻八
又皆秀句一年一度此深杯均饒風致宜西涯

皇墩守溪遂菴諸
公交與和酬也

題畫寄楊應寧

顏雲濕不飛釀作楚江雪林木凍已僵汀葦吹欲折荒
村煙火稀野寺鐘聲歇端居思美人千里成濶別天寒
鴻雁宵地僻音塵絕囊琴誰共彈悵望頗鬱結貽此瓊
華圖聊以表高潔

小畫

浦雲煙樹路盤紆白首青山興不孤我亦有亭歸未得

東風吹雨長蘼蕪

邵珪一首

珪字文敬宜興人成化己丑進士官至嚴州知

府有半江集

李賓之云邵文敬善書工碁詩亦有新意如江流如白龍金焦雙角

短又有半江帆影落尊前之句人稱為邵半江

馬鬪虎

天門名馬真龍媒萬里新自流沙來先皇知爾才磊落
放入虎圈與虎搏霜蹄蹴蹋虎即斃英風颯爽來天際

當時觀者皆歎嗟唐家豈數拳毛騮

周瑛 三首

瑛字梁石莆田人成化己丑進士仕至四川右

布政使有翠渠類橐

林雨可云先生奇語奇情出之簡易嘗自題橐云老

去歸平澹時人或未知當為定評

履霜操

母兮兒憎父兮兒怒跼蹐天地憐不知其故父在高堂
兒在郊圻晨興履霜踵血淋漓荷衣不煖捋食不飽不

即捐溝壑念我父母父本兒愛母本兒憐一朝放逐實

兒之愆維鳥有穀維蟲有羸父兮母兮其或歸我

羅子應云

韓子履霜操覺伯奇有怨怒之氣未免害義若翠渠作一篇之內吉甫惑於後妻之失既不可掩伯奇傷已自訟不敢怨怒而覲父母自省之意亦明詞婉意切足補韓子之失與拘幽操並讀可謂一忠一孝也矣

感興

持刀斫月光月光何曾斷縛帚掃樹影樹影依然滿人
皆惡樹影礙此月明多樹根苟不拔其如月明何

詠古送陳白沙歸南海

東都事矯激西晉尚清虛一時意自適社稷隨丘墟譬
彼門戶開轉運由其樞大勢一傾倒力救將何如君子
閱世多立說慎其初擇中而守固孔氏有遺書

馮蘭一首

蘭字佩之餘姚人成化己丑進士改庶吉士仕

至江西提學副使有雪湖集

黃太冲云佩之在京師與西涯木齋

雅相好木齋歸田後與佩之唱和無虛日間書以寄西涯西涯輒和之有云惟應兩巾履長得夢中遊又云羨君江海上猶有舊同遊是時西涯為一世宗工而於佩之則敬為老友也

詩話謝朓以宰輔歸田與佩之締姻日以詩
札酬報澧淵劉應徵知餘姚縣事為刊湖山唱
和詩二卷集中句可采者謝如嘉客不來虛掃
榻好山難致即移家路當樹與雲深處每及朝
隨月上時野色遙連晴樹杪秋聲忽動暮鷄羣
樓臺月上寒雲盡村巷泥乾宿雨餘扶老最便
方竹杖入秋却愛早禾田馮如鏡裏流年從老
去山中舊業得生還遠林返照明村落斷岸分
流入海田絕頂夜晴先見日中峰春暖易生雲
雨疎籬落菊開晚水涵湖田雁下遲秋晚菜畦
依水種日斜村姬過隣春雲中僧住茅茨屋雨
後人耕斤齒田沙淨雨苔無屐齒竹深秋墅有
基聲雷霆忽作三更雨江海疑生六月冰燈火
誰家無樂事江湖此夜有離人城市已無踪跡
到江湖合有畫圖傳其
詩頗難優劣洵同調也

奉答木齋病起見懷二十韻

海氣明曙霞湖光渺秋昊十月木未霜楓林景逾好疎
疎籬下花寂寂澗邊草閒居田事休委巷人跡少東瞻
牛屯峰秀矗雲之表種梅已成蹊中構一亭小謝公有
好懷藉此以終老佳辰縱嬉遊真境越清悄倚酣或高
歌興與秋空杳一卧動逾月予懷幾昏曉得詩知強健
頓紆腸九繞古人慎養生弭疾今須早周爰重勿藥莊
篇戒如槁金蘭久要義歲寒願相保詩古意興長三復

開素抱喜公眼增明萬象都了了南齋冬日暄遺編得
幽討擬尋亭上盟牽舟汝湖道梅溪香欲浮苔石淨於
掃扶杖我能陪公無笑潦倒

張習一首

習字企翱吳縣人成化己丑進士除禮部主事
歷員外郎出為廣東提學僉事

和石翁水悶

舊居忽異東西瀼白水茫茫不見鄰始下方牀堪濯足

每疑汎宅僅棲身魚鰕易覓應兼味畎畝全沈已概貧
好鼓蘭橈放歌去乘桴浮海是何人

楊光溥一首

光溥字文卿沂水人成化己丑進士有沂川集
春去

樓外青帘近酒家鶯聲巷陌夕陽斜東風暗地隨春去
幾日無人喚賣花

梅江一首

江字文淵嘉興人成化己丑進士授廬江知縣
擢南京貴州道御史出為四川按察僉事

都門送弟還鄉作

高城曉角意如何
執別離亭淚欲沱
池館夢中青草盡
鵲鴿原上白雲多
西風苦憶歸帆影
落日時聞鼓棹歌
最是明朝傷獨處
寒山古木對嵯峨

呂憲一首

憲字秉之秀水人
大學士原子中
成化辛卯順

天鄉試由中書舍人遷禮部郎中仕至太常卿

有九柏山房存橐

石邦彥云太常遊於二泉方石之門詩古澹冲雅微婉縕

藉家居日對九柏吟咏不輟忘其老之將至也

詩話太常詩名藉甚朝野特為吳中文沈諸君所推重人不敢以任子視之是時詩派方習為纖麗圓熟太常獨好盤硬語宜其傲睨一世也六十詩云治聲社酒分隣父含笑山花付侍兒移病詩云官衙馬瘦無餘粟海國魚鮮正晚潮寄友詩云愁無却老青精飭夢有藏書白石龕皆瀟灑可誦

天寒夜卧

雨久當成雪天寒不肯明君親南北夢城闕短長更有
病官何物無聞老此生茅茨築新屋妻子念歸情

吳寬十三首

寬字原博長洲人成化壬辰賜進士第一授翰
林修撰歷諭德左庶子少詹侍講學士擢吏部
侍郎累官禮部尚書兼翰林學士掌詹事府事

卒贈太子太保謚文定有匏菴家藏集

李賓之云原博

詩深厚穠郁脫去凡近而古意獨存

王濟之

云匏菴為詩用事渾然天成不見痕迹洗盡近

世尖新之習

王元美云吳匏菴如

學究出身人雖復閒雅不脫酸習

詩話匏菴與沈啓南史明古矜契最深車馬登
筵往還無倦其詩亦足相敵在都門闢東園築
玉延亭留客園中草木莫不有詩吏部後園亦
為掃除欄藥檻花暇必酬和極友朋文字之樂
余嘗見公家遺書偶有流傳悉公手
錄以私印記之前輩風流不可及也

讀廖司訓詩

先生撫州彥來為婺州師清晨坐高堂講席擁皋比弟
子百數人出入矩與規先生以身教未嘗費言辭共云
今人中得此胡翼之我友王允達托交兩無疑恨我不

識面示我所寄詩詩長三過讀讀之竟忘疲其辭如劍
鋒凜然白差差上憂吏治陋下憂士習卑三復先生言
苦心良可悲欲將今世人化為唐虞時竊觀先生心卓
爾出等夷但恐言太高反為當路嗤方今法宮中聖人
貴無為一相久自擇謂能繫安危守櫝既有人自毀玉
與龜諒非有言責勿起出位思幸卷三寸舌橫經固其
宜撫州古名郡山川有諸竒草廬與道園近世尚可追
著書寓微意足為千載垂再拜向先生吾言止於斯

送張都水

幽燕建都邑九鼎從而遷八政一曰食仰此東南偏歲
漕四百萬舳艫相後先雲帆罷轉海江淮達且沿迤邐
經齊魯有渠昔人穿噫此尋丈耳譬若溝澮然置牖以
啓閉相時為節宣巖巖魯山下平地多流泉泉流入漕
渠其始纔涓涓瀚瀚惟自足安知可浮船疏導非人力
濟世嗟何緣張君官水部治水思昔年往來相度之滌
源同九川功成既歸朝大臣慕其賢封章始朝薦行李

仍夕旋維此百泉眼利博人爭傳入渠有餘漑可溉萬頃田只今東方民老幼咸顛連槁項與黃馘嗷嗷口流涎渚洩倘有策旱澇何須憐漕粟國用足種粟民生全他年司馬氏載入河渠篇

苦雨

入夏憂不雨雨甚又可憂幸此米價減宿麥且有收人情稍覺舒天意復見尤一雨過三日其勢殊未休九市成九河可車翻可舟側聞城西偏水患更不侔一家三

壓死傷者恐不瘳事急欲走避有足誰家投往夜東門
火平明失其樓雨來火不作火滅雨乃流漢儒傳五行
箕子叙初疇人邇天亦邇此理或可求賦詩遣孤悶廢
卷發長謳

謝屠公送西域眼鏡

眼鏡從何來異哉不可詰圓與莢錢同淨與雲母匹又
若台星然兩比半天出持之近眼眶偏宜對書帙蠅頭
瑣細字明瑩類椽筆余生抱書淫視短苦目疾及茲佐

吏曹文案夕未畢太宰定知我投贈不待乞一朝忽得
此舊疾覺頓失謝却撥雲膏生白訝虛室扁鵲見五臟
未必有奇術隨身或持此遂使目光溢世傳離婁明雙
睛不能沒千年黃壤間化此直百鎰聞之西域產其名
殊不一博物有張華吾當從彼質

鍾馗元夜出遊圖

終南進士狀酖醺虎韉烏弁鴨色袍青天白日不肯出
上元之夜始出為遊遨鬼婦塗兩頰鬼子垂一髦徒御

雜沓聲嗽嘈導以靈姑旗翼以大食刀魑魅罔兩不可
一二數肩擔背負手且搯戰傷人血化燐火各出照地
點點如焚膏陰風颯颯吹荒皋百怪屏氣不敢號汝輩
遠遁莫我遭我欲飲汝血甘如飲醇醪我欲啗汝肉美
如啗羊羔肯容汝輩在世長貪饕吁嗟乎魑也真為百
鬼豪所以唐王想其像詔令道子寫以五色毫憶當天
寶年左右皆爾曹太真宮中逞狐媚祿山殿上作虎嘯
當時便須縛以蒼水使者所捫之赤絲獻於天閭尸諸

獸牢何為令溫泉生汙泥驪山長蓬蒿吾嘗疑其事展
圖不覺再把短髮臨風搔

送胡彥超

年過四十不作官還將短髮籠儒冠平生一經已爛熟
胡為挾入橋門觀前年鄉書名始刊曲江又避春風寒
重來橋門住三載打頭矮屋聊盤桓朝齏暮鹽不滿盤
何須故人勸加餐日高對案笑捫腹自有五色之琅玕
側身西北望長安眼中一朶紅雲團天門欲往澀如棘

若比蜀道尤云難嗟哉出處誰得似頗似吳下吳生寬
吳生作詩忽盈紙送君還到春闈裏春闈多士多如蟻
勿將老少分憂喜君不見韓昌黎張童子同是陸公門
下士昌黎文章如皦日童子聲名逐流水人生傳世有
如此區區科第何難耳

題鄭郎中所藏張師夔畫

師夔畫好不可誣筆法頗似崑山朱未論人品高與下
胸次自是吞江湖平林絕澗雲模糊深處自有哀猿呼

青苔細路絕人跡遇著即是漁樵徒忽然空翠落衣袖
崇山峻嶺相縈紆丹梯百尺通玄都仙家茫茫還有無
卧游三日猶不足王維輞川無此圖題詩却問鄭大夫
此圖應著千金沽

賦黃樓送李貞伯

維河有源星宿同導河積石思神功濁流汗漫失故道
積石却與澶淵通平郊脫轡萬馬逸一夜徑度徐州洪
徐州太守蘓長公夜呼禁卒登城墉一身未足捍大患

豈無木柵兼竹籠戲馬臺旁二十里有隄橫亘長如虹
高城不浸三版耳挽回魚鱉仍耆童防河錄成天有工
黃樓高起城之東五行有土可制水底用四壁塗青紅
太守登樓賓客從舉杯酌水臨長風河伯稽首受約束
不敢更與城爭雄水流滔滔向東去紆徐演漾殊從容
負薪投壁竟何用漢家浪築宣房宮自公去後五百載
水流有盡恩無窮我生慕公公不逢安得置我茲樓中
穎濱淮海獨何幸留得兩賦摩蒼穹鳳池舍人今李邕

南行別我何怱怱登高眺遠必能賦封題須附冥飛鴻
送王合州

南出都門去逢人問合州一官為別駕萬里付扁舟
巫峽流泉曉峨嵋半月秋緣知蜀道易隨處有詩留

登故友史西邨小雅堂

路繞黃家溪水長春風灑淚復登堂草荒求仲常來徑
塵滿元龍舊卧牀分手死生嗟契闊傷心聚散覺淒涼
高丘數尺棲神地碧樹爭凋不待霜

金... 卷二十八

分韻送貞伯

忽對春風南陌還
思夜雨西窗高
丘恨不干尺望見離
人渡江

題畫

水長鵝肫蕩口花飛鶯脰湖邊
吳歌唱徹歸去日暮青
山滿船

除夜

夜深燈火四無隣
強醉金陵麴米春
却憶去年何處宿

三义河口更愁人

楊一清 二十一首

一清字應寧雲南安寧州人成化壬辰進士授
中書舍人陞山西提學僉事遷陝西副使召為
太常卿拜左副都御史巡撫陝西歷戶部尚書
入直內閣進少師兼太子太師吏部尚書華蓋
殿大學士卒贈太保謚文襄有石淙棗

李獻吉云先生

詩務持麗整俊拔典則七言律為最工雖
唐宋調雖瑜瑕靡掩然所謂千慮一失也

詩話遂菴古詩原本韓蘄近體一以陳簡齋陸
敬翁為師獻吉送昌穀詩云吾師崛起楊興李
力挽元化迴千鈞初意揚非李敵不過為師同
耳及觀石淙集實有高出李者乃知文士以千
秋自命類不
輕許人也

舟中感興

宋朝西事興廷議仗數公三策戰守和持論各不同韓
公初主戰提旅當敵鋒至今好水川流血餘腥風范公
圖經略志守不志攻雕陰扼其吭靈武城其雄大順屹
有築清澗引而通雖無敵俘獻已遏敵馬衝終教彼膝

屈西顧聊從容臣本鉛槧儒豈不念除兇功成枯萬骨
生意隨秋蓬而况兵家事勝敗誰能窮設險有明訓著
之易象中沙場四百里深塹連高墉一勞還永佚誓以
輸愚忠云胡嘵嘵者計不究初終作詩俟君子庶幾希
後功

聞人道漢中事

相逢漢中人為問漢中事政殘令復弛此階誰作厲有
兵不識關有地無遺利紛紛散攘徒來自川西地初焉

甚微眇可以折筭治玩寇者為誰彌文巧蒙蔽星星不
時撲漸成燎原勢重煩宵旰憂撫捕勤大吏彼氓亦何
知從亂豈其意分明盜兵革潢池作兒戲胡忘渤海言
而味朝歌智居然恣屠戮為此首功計番兵及礦徒剽
掠失防制如以賊禦賊進退誰適避寧偷從賊生懼作
迎降斃遂令漢沔間羣盜益昌熾村落莽成墟堊煙浩
無際師久力漸屈饋餉遠難繼壯士飢而逃道途目相
視閩津不敢詰將領莫能致仲秋交兵辰諸軍自同異

貔貅頗創傷狐鼠未懲艾如聞制府來轅門稍生氣夾
攻本良策萬全亦非易成功在此舉莫使再顛躓人言
川賊興正坐科徵敝民窮盜斯起思之無乃是反本宜
急圖窮誅竟何濟邇來天監昭大奸伏礎鑕湯網解而
疎武戈藏不試寄語賣劍人太平今立至

山中吟

兩旬天氣看復陰黑雲故故團春岑耳邊時聽潭龍吟
深山大谷不可宿前途風雨愁人心

未至府谷得山西胡憲副源梁詩先是予與源梁
約保德府谷為渡河之會源梁先至以詩來速和
韻答之

榆林東來神木道我心擾擾風中燼病軀不任馳驟勞
況是長途阻霖淖眼前車馬恨躑躅夢裏衣裳或顛倒
當秋一雨近歲無破屋家家蛙產竈至今溽潤滿庭戶
蟻蛭縱橫聚難掃人可勝天理則然古有堯湯非羿羿
吾皇憂民過往聖德旨蠲租憫無告邇來天澤閼不流

赤地茫茫方苦燥，頓使呻吟化歌舞。果然大命由人造，
知君命駕千里來，神交豈是私相好。一官同擁繡，豈服
矢心不媿皇天燾。翻愁左顧勤，撝訶賴有先憂繫。懷抱
晉陽一別六七載，如瞽偃偃藉誰導。龍門尚隔衣帶川，
意逐書郵已先到。陽春下里本非類，木李瓊琚浪酬報。
吁嗟伐木久不聞，友道蒼茫竟彫耗。人間此會苦難得，
肯似山陰空返棹。與君興在希聲前，不待冰絃已成操。
元龍大床吾欲卧，可聽登堂窺寢奧。

送安成張都憲督運還鎮

文皇北狩開洪基古之燕薊今邦畿官河舳艫挽飛粟
歲四百萬供京師直從三湖到瀛海四十餘閘中逶迤
雖云恭襄擅勞績廟算天假非人為漕規百年漸成敝
民財已盡兵兼疲豪門貸券不知數公廩未入私逋追
姦人復此恣漁獵罔念膏血成塗泥君王聞之重悽惻
曰此瘡痍當底綏詔求經濟起頽廢公名首應朝堂推
都臺舊豸許重著先聲忽滿清淮湄褰帷問俗布新政

風霜雨露無偏私人言更化先將領疏屏庸瑣將無遺
明揚才俊給任使數月威令如飈馳高山虎豹莫敢狎
精采一變非前時疲氓散卒總生氣昔者戚戚今嬉嬉
朝廷綱紀藉臺憲頗恨吾人翻壞之姑息之風滿天下
漢家三尺空然持剛者矯枉不達變志固可取終何裨
不然淫刑肆屠刈忍寡人婦孤人兒公柔不如剛不吐
寬嚴兩酌還平施淵魚苛察豈公事權度在我誰能欺
漕司政務亦填委老匠坐授羣工治如身使臂臂使指

大綱一舉萬目隨安得皆公撫諸鎮頓使赤子回春熙
嗟予關中舊分憲蒞公節下叨公知迂疎未敢辱同調
頗覺氣類元相宜公今入覲天顏喜縉紳動色瞻風儀
太常閒曹無報稱却望賢勞增忸怩秋風冠蓋送歸鎮
把酒欲賦難為辭似聞臺省虛公位尚為淮人歌去思

畫雁

江岸蘆花秋簌簌江頭旅雁羣相逐啄者自啄宿者宿
昨夜南樓聞北風天長水闊雲濛濛何當舟一葉擢入

蘆花叢

甘涼道中書事感懷

二首

望望日以遠行行春又闌蒼茫青海月咫尺玉門關北
關星辰上南州夢寐間青山隨處有一見一開顏

弧矢威天下雷霆震域中大兵方出塞小醜自相攻繼
絕君王義宣威將帥功從今宵旰慮不復在西戎

聽雪

庭樹蕭蕭夢屢驚幾回風景逼人清坐吟食葉春蠶句

起聽空山裂帛聲
寒落瓦溝停更響
夾疑天籟靜還生
憑誰為續幽蘭調
萬古悠悠此夜情

孤山堡

簇簇青山隱戍樓
暫時登眺使人愁
西風畫角孤城曉
落日晴沙萬里秋
甲士解鞍休戰馬
農兒持券買耕牛
回思未築邊牆日
曾得清平似此不

出連雲棧

雞頭關下石杈牙
傍險憑高此駐車
一水縈紆通漢沔

萬峰迴合控褒斜雲中板閣燒難絕谷口竇管翠欲遮
蜀道秦關俱莫論於今四海正為家

山丹題壁

關山偏仄人踪少風雨蒼茫野色昏萬里一身方獨往
百年多事共誰論東風四月初生草落日孤城蚤閉門
記取漢兵攻戰地沙塲猶有未招魂

還至莊浪

平沙落日路漫漫千里風光一色看剛道雨來翻見雪

偶然熱後忽生寒城非據險兵猶少地屢經荒食更難
稍喜沿邊諸將吏肯甘清苦慰彫殘

聞河套有警

百二秦關故可憑延寧千里險堪乘濁河下遶還成套
曠騎冬來慣蹋冰塞上煙塵嗟未息胸中兵甲媿無能
粟芻山積君休羨民力年來已不勝

出郊

向來塵慮已真拋一卧經年始出郊天下華陽稱八洞

人間福地是三茅病求仙术聊充餌老愛雲松願結巢
夢覺迷途自茲始北山猿鶴謾相嘲

將至寧夏

奉詔西征駐節時元戎奏凱已先期苗民自逆三旬命
猱狁何勞六月師燈火家家開夜戶弓刀隊隊卷風旗
益兵加賦休重道財力於今兩不支

邊汝成侍郎話舊

病裏詩成手自書重逢又是十年餘已看精力消將盡

何止聰明較不如西去幾回勞遠夢南來聊得慰閒居
故人不道吾衰甚猶有微言為起予

竹西書屋

萬竹參差路不分草堂風景隔塵氛他年有約東鄰卜
半為先生半此君

和西涯漫興

園亭風日入清秋綠樹重陰護四周頗恨青山看不見
似應別起看山樓

遊茅山

丹梯百丈許攀緣萬古華陽此洞天不獨山人能愛客
野花啼鳥亦欣然

題畫送謝岐歸閩

有足不蹋風塵車有手不草封禪書茫茫天地誰知已
還指梅花是故廬

文林三首

林字宗儒長洲人成化壬辰進士除永嘉知縣

改博平陞南京太僕寺丞遷知温州府有文溫

州集

永嘉縣齋寫懷

墨綬垂青絲銅符寵郎秩駕言謝朝行出領滄海邑脈
脈辭親知依依去鄉國淅行僅千里已在東南僻地遠
煩刑誅年負正艱食自顧書生愚疇堪付休戚流移已
懷慚征歛况余職平生跌宕懷雅志山水適及此東嘉
遊清真信靈域豈無康樂情坐有民社責歛板事承迎

鈎稽困文籍拂意不能歸自媿陶彭澤

靜海驛

深夜驛途靜長河瀚海通舟明沈水月燈暗落潮風
暝色浮煙外春光欲雨中年年苦行役踪跡任飄蓬

舟中有懷林待用

渺渺長波映遠空依依新柳颺春風相思人在青山外
盡日舟行細雨中汲黯身為漢廷重杜陵詩到錦城工
天王明聖江湖遠贏得驅馳兩鬢蓬

周軫一首

軫字公載莆田人成化壬辰進士歷官江西按察使有章林藏橐

和竹溪見贈歸來亭

小亭岑寂四窗開坐看春風長綠苔為愛多情雙燕子
暫時飛去又飛來

黃榮一首

榮字儼仁莆田人成化壬辰進士官按察僉事

有柳南集

牧牛圖

江草青青江水流，卧吹孤笛弄清秋。
放牛莫放南山下，昨日南山虎食牛。

楊 榮 二首

榮字時秀，餘姚人。成化壬辰進士，官工部都水

主事。

黃太冲云：都水工於詩，會試舟中，取唐音和之。月餘成秩，一時風尚和唐音，而都水

能得其風致。徐子元詩：談與慈溪張式之同品。

江西旅懷

客夢家千里鄉心柳萬條
片雲遮海嶠一雨送江潮
戀闕綈袍在懷人尺素遙
春光看又晚何處灞陵橋

子規

江天夏夜露氣清
山鳥忽作斷腸聲
莫道啼多不鮮意
催人歸去最分明

明詩綜卷二十八

總校官庶吉士臣張能照

校對官檢討臣龔大萬

謄錄監生臣李士勲

欽定四庫全書薈要

集部

明詩綜卷二十九



詳校官編修臣王天祿

欽定四庫全書薈要卷二萬五百二 集部

明詩綜卷二十九

翰林院檢討朱彝尊編

遷一首



遷字子喬餘姚人成化乙未賜進士第一累官
少傅兼太子太傅戶部尚書謹身殿大學士贈

太傅謚文正有歸田橐

李時遠云木齋歸田後
專事吟詠有冲澹閒雅

之趣山莊一首
真得陶家情景

早過山莊避暑次陶公韻

侵晨理孤櫂山居將避喧
好風忽南來吹我烏帽偏
宿鷺未移渚落月猶在山
侯門兩穉子問我何時還
高山與流水此意向誰言

王鏊四首

鏊字濟之吳縣人成化乙未賜進士第三授翰林編修歷侍講諭德進學士擢吏部侍郎累官少傳戶部尚書武英殿大學士卒贈太傅謚文

恪有震澤豪

邵國賢云濟之詩蕭散清逸有王岑風致

靜志居詩話濟之以經義重詩非所長集中十二絕句甚得諷諫之體今錄其三諸公南巡詩雖多皆當遜席

己巳九月舟次相城

幾年約茲游為訪石田叟石田今已亡不使此言負相知
三四人拏舟過湖口行行抵相城自卯將及酉四顧何茫然
天水合為數茅屋數家存荒蒲與衰柳本來魚鼈宮自合鷗鷺
守始田者為誰餒也非自取有司事誅

求亡者十八九念此為傍徨獨立延佇久作詩當風謠
以告民父母

絕句 三首

少年天子重邊功烏帽戎衣手角弓行徧漁陽來上谷
並無曠騎到雲中

安化跳梁即日平中原羣盜敢縱橫洪都定亂誰堪使
除是君王自將兵

燕雲漠漠鎖重樓八駿驅馳正未休莫道十旬猶不返

金陵原是帝王州

馬中錫 三首

中錫字天祿故城人成化乙未進士拜刑科給事中再疏言事受杖出為雲南按察僉事改陝西入為大理少卿以右副都御史巡撫宣府正德初起撫遼東召為兵部侍郎劾罷劉瑾黨之冒邊功者瑾矯詔改南京工部尋褫職瑾誅起撫大同召為右都御史督軍務討流賊陞左都

御史掌院事以師老玩寇徵下獄踰年卒有東

田集

西掖晚歸有感時事聊賦述短章用呈同志者

虛窗缺月照人寒殘雪留簷凍不乾
衰信已憑雙鬢寄世緣聊作一枰看
斜封官好空批敕神武門高未挂冠
誤却登山與臨水十年騎馬走長安

晚渡咸陽

野色蒼茫接渭川白鷗飛盡水連天
僧歸紅葉林間寺

人喚斜陽渡口船
表裏山河猶往日
變遷朝市已多年
漁翁看破興亡事
獨坐秋風釣石邊

謁元世祖廟

世祖祠堂帶夕曛
碧苔年久暗碑文
薊門此日瞻遺像
起輦何人識故墳
棹楔半存蒙古字
陰廊尚繪伯顏軍
可憐老樹無花發
白晝鴉鳴到夜分

曹潔躬云用事典
實詩辭悽惋可稱

絕唱起輦
見元史志

吳洪一首

洪字禹疇吳江人成化乙未進士累官南京刑部尚書贈太子少保

詩話少保弘治中官太僕卿與禮部尚書長洲吳原博禮部侍郎常熟李世賢都御史長洲陳玉汝吏部侍郎吳縣王濟之詩酒唱和立五同會五同者同時也同鄉也同朝也而又同志也同道也因以為名亦曰同會者五人爾少保因屬越人丁綵繪作圖五家各藏其一於是原博序之濟之題詩其後所云鄉邦自昔誰同會人事從來若不齊是已今諸家所藏或亡於兵或燬於火予從同官徐電發所獲見一卷蓋少保家藏物也

客中和史明古

一尊誰共合朋簪又見空階覆綠陰草色不銷游子恨
月光偏照故人心霜前白雁音書在雨外青山別路深
安得攜琴溪上去社中重覓舊知音

秦 璫

璫字廷贄崑山人成化乙未進士官至貴州按察副使

閒居

絃桐不終曲坐起囊我琴非憚摩拊勞所嗟無賞音中

心潛鬱陶曳杖循空林松風有古意石泉清俗心愛此
愴忘歸前山生夕陰

王弼一首

弼字存敬黃巖人成化乙未進士除溧水知縣
入為刑部主事出知興化府有南郭集

舶上謠

連艘飛過石頭城獵獵黃旗發鼓聲中使面前傳令急
江南十月進香橙

彭綱三首

綱字性仁清江人成化乙未進士雲南提學副使有雲田集

宿鄧川驛

風走落葉聲山犬吠不已披衣夜出戶明月照溪水

李渭

清云誦之泠然

姚安分司

吟人夜未眠迢迢漏初永起步山月中疎枝露猿影

李渭

清云詠後不以聲而以影彌見體物之工妙

詠刺桐花

樹頭樹底花楚楚風吹密葉翠翩翩露出幾隻紅鸚鵡
楊用修云刺桐花雲南名爲鸚哥花形酷似之彭公此
詩本四句命吏寫刻於扁遺其一句復誦之自覺意足
乃不更改其詞風韻可愛

洪貫二首

貫字唯卿鄞縣人成化丁酉舉人鄧州教諭遷
從化知縣改正和有太白山人橐

李杲堂云先生詩法盛唐

嘗擬杜陵秋興八首傳至京師李文正大加賞
歎晚結廬東臯自號稼翁年九十尚不忘摘翰
每一詩成好事
者輒傳寫焉

唐宮詞二首

花萼遙連務本樓五王文采盡風流不知凝碧池頭宴
落盡宮槐一樹秋

雙飛金鳳綠雲翹舞袖三千盡絳綃一自鑾輿西幸後
白頭如夢說前朝

梁 儲一首

儲字叔厚廣東順德人成化戊戌進士選庶吉
士授編修進侍講洗馬掌翰林院學士遷吏部
侍郎進尚書累官至少師兼太子太師華蓋殿
大學士卒贈太師謚文康有鬱洲遺藁

元夜應制

雲中珠翠壓鰲頭雉尾雙雙護冕旒聖主經年少巡幸
春來方覩屬車遊

伊 秉一首

乘宇德載上元人成化戊戌進士歷官按察僉
事有集

遊虎丘

舟行山在眼到門山忽失去郭僅七里攀磴窮百尺巖
姿互明晦潭影杳深黑步倦松暫憩醉眠草堪席不逢
試劒人猶覩試劒石臺殿半空起雞犬下方隔經聲雜
梵唄禪定悟空寂晉唐厯劫多劉白不世出閨劇固殊
調登覽各有適重來預作期昨游宛然憶了性未有因

寓形何苦役依此憺忘歸於焉永終日

林俊四首

俊字待用莆田人成化戊戌進士授刑部主事

歷員外下獄謫姚州判官復官南京刑部員外

擢雲南按察副使進按察使調湖廣轉廣東右

布政使以僉都御史巡撫江西改四川陞右都

御史工部尚書改刑部加太子太保謚貞肅有

見素西征集

楊應寧云見素詩宗子美晚乃出入黃山谷陳無已間初視之若有

隱澀語久而咀嚼悠然有餘味焉 王元美云
林待用如太湖中頑石非不具微致無乃癡重
詩話中山狼小說乃東田馬中錫所作今載其
集中世傳以訾獻吉者數其負德涵也致之康
李未嘗隙未黃才伯有讀見素揀空同奏疏詩
云憐才不是雲莊老愁殺中山獵後狼然則當
日所訾乃
負見素耳

門扇峽

灤西一舍近兩山勢迴合巨石壯此門鐵衣護周匝楚
蜀錯犬牙乾坤互開闔當關一夫守萬馬不敢踏雲龕
嵌玲瓏元氣深吐納推蓬見巫峰哀猿響相容

別鄉人

驛路迷燕浦官梅動越吟相看今日意同是故鄉心
祖道寒沙上停撓綠柳陰滄洲有奇事未老忽抽簪

送方上舍

客路阻風沙離心逼歲華潮平今夜月梅作去年花
囊澀書還購天寒酒待賒席珍逢聖主未許卧煙霞

有題

山崦雲猶暮江天雨欲晴院深芳草合日落野舟橫古

路稀人跡青林但鳥聲春風期載酒相對面柴荆

陳章一首

章字一夔松江華亭人成化戊戌進士除刑部主事歷郎中降瑞州府同知遷高州知府移黃州有西潭橐

詩話一夔自高州移黃州吳匏菴哀詞云一朝下恩旨稍幸得量移齊安佳山水足以為詩資如何始聞命已與人世辭蓋未至齊安而沒也又云平生無所好所好止於詩積成西潭橐干首尚多遺今其集竟不可得

即席贈趙栗夫

菜市街西新卜居豆棚瓜蔓共蕭疎胸中富有書千卷
誰信家無儋石儲

陳璫一首

璫字玉汝長洲人成化戊戌進士改庶吉士授
戶科給事中歷南京都察院左副都御史有成
齋集

詩話成齋出西涯之門當時雖不以詩名而恒
與西涯方石匏菴諸公接席聯句知見賞於西

涯者
深矣

曉經分水

卧聞水禽聲推牕看分水
低岸雜茭蒲吳淞宛相似
波澄綠漪漪流急青駛舂
舞翠帶長鷗翻白雪比垂楊
遷嬌鶯柔莎露游鯉分明一
鏡開身在鏡光裏停梭緩
緩行神爽情亦喜我苦思歸
人鄉問將近矣

陳
娃一首

娃字文用閩縣人成化戊戌進士有留餘橐

次毛叅將秋日江居

雲淨羣峰出江空一鳥遲
雨前蘿補屋霜後菊編籬
巢燕非新主沙鷗是故知
考槃人自取天地豈吾私

包鼎一首

鼎字汝調嘉興人成化戊戌進士除兵部主事
歷郎中出知池州府

己丑下第南還

孤舟千里賦南歸慚愧逢人問
禮闈野浦關情芳草遠

曲江回首杏花稀
半生事業雙蓬鬢
十載風塵一敝衣
臨水高歌向何處
夕陽煙樹共依微

林榮一首

榮字仲仁合浦人
成化戊戌進士
歷官雲南按察副使

薊門聞笛

冒寒重到薊門遊
羌笛嗚嗚起戍樓
應有開元遺譜在
月中三弄小梁州

孫衍一首

衍字世延松江華亭人成化戊戌進士除知馮
陽州遷南京刑部員外郎出為延平知府有雪
岑集

寄沈宗遠

挂席曾逢江上舟別來彈指又經秋間從何處爭碁局
醉共誰人較入聲酒籌金鯽魚池芳草合女蘿花樹小庭
幽客中無限相思意坐對寒燈獨自愁

黃珣一首

珣字廷璽餘姚人成化辛丑賜進士第二累官南京吏部尚書贈太子少保謚文僖

應制勸農

四民皆天職嗟農獨苦辛所以古哲王巡省及茲辰簫鼓吹豳頌訓迪良諄諄東郊土脈動好鳥鳴芳春桑園拂其羽催耕一何頻乘時播嘉種原隰交畇畇念茲民所天珠玉安足珍一日苟不作飢寒將立臻勿恤霑體

勞但憂年歲屯霑體勞尚可歲屯傷我民憶昔先皇時
端居軫郊闡載歌憫農詠丕揚列祖仁禁苑藉千畝雨
暘雩百神玉食豈不足貴令四海均九重尚結念况爾
謀其身古人有良言歲計在于寅豈伊公家賦父子亦
以親春風正發育萬物皆鮮新勉矣東作力竚看西成
裡

趙寬一首

寬字堯夫吳江人成化辛丑進士除刑部主事

歷員外郎中出為浙江提學副使遷廣東按察使有半江集

題畫

細雨入林深孤雲映山薄何處是歸舟臨風倚江閣

張吉 二首

吉字克修餘干人成化辛丑進士除工部主事坐上疏貶景東通判歷官貴州左布政使有古

城集

詩話古城窮理講學其詩罕傳觀其序晦菴感
遇詩謂兼蘇李之體制陶孟之風調韋柳之音
節非漢晉以下詞人所及生乎後者不根於此
而有能詩聲我不敢知也其論詩亦非戶外語
今錄李忠烈祠送迎神曲李東陽記云成化五
年春正月長沙府知府事臣錢澍言臣所守潭
州當元兵至時宋知州李芾盡地而守士卒皆
殊死戰城且陷芾召帳下沈忠遺之金曰吾力
竭當死吾家人不可辱於俘汝盡殺之而後殺
我忠辭不獲命乃醉其家人徧刃之芾亦引頸
受刃忠焚芾居還自殺其妻子復至火所自殺
是時先芾死者知衡州尹穀死於火參議楊震
死於池後芾死者幕僚陳億孫顏應焱譚民多
舉家自盡城無虛井縊於林者相望其事昭晰
在史傳布揚在天下決洽在郡人耳目而郡之
祀事不立其為闕典不細臣已立祠於芾所居

故地以尹穀等配著諸祀典儀物使有司永有
所遵式事下禮部具春秋祭幣用豕一羊一菜
盛備餘各羊一制可其本
未頗詳附注以便觀者

李忠烈公祠迎送神樂章

二首

紛犀甲兮翠旂亂湘流兮若雲春露兮秋霜無遠無近
兮援枹執鼓折芳馨兮代舞旅牲醴兮芬熏公入廟兮
有白其駒我維公駒兮在庭之隅公不醉飽兮我呻且
吁

脩蛇兮綦綦猗犬兮言言臨衝兮鼎鼎曠騎兮洗洗兵

血戰兮幾盡涕橫流兮霑巾彼蒼者天兮胡不仁死為
趙氏鬼兮生為宋臣嗚呼我公兮人道之紀口不忍言
兮心曷其已潔我肥瘠兮稱我兕觥千秋萬歲兮祀事
孔明

盧

格一首

格字正夫東陽人成化辛丑進士除貴溪知縣
擢江西道御史有荷亭集

詩話正夫難經伉伉雖朱子亦不心服其讀易
詩云三聖若專尊卜筮宣尼何用絕韋編又云

世儒問我五經原易道原居六畫先若說義文
專卜筮街頭盲瞽盡真傳又詠詩云夫子刪詩
立義精國風雅頌各分明考亭半作淫奔什何
用為邦放鄭聲所撰荷亭辨論八卷同郡章楓
山不以為非叢山劉念臺為作集序而曰後儒
不及前人由其果於自信之意多而存疑者寡
也幾於袒左矣

遣興

莫歎風塵行路難
閒過僧舍借花看
數聲啼鳥不知處
滿地綠陰清晝寒

葉元玉一首

元玉字廷璽清流人成化辛丑進士有古崖集
次龍門衛作

龍門關外龍門衛元是紛紛狡兔場今日草枯蕃馬瘦
將軍穩卧綠沈槍

王 敬 三首

敬字漢英南京錦衣衛人成化辛丑進士歷官
太子少保兵部尚書贈太子太保

渡大同江和董內翰

渭水元歸海山城半入江春潮翻石壁飛雨打船牕作
賦才誰健凌雲氣未降濟川輸董相不日看經邦

詩話宮保與董文僖越同使朝鮮
迭相唱和而諸詩蒼老頗勝董公

登浮碧樓

山閣凌空起孤雲扶雨飛好花臨驛路小艇占漁磯石
磴斜通郭煙邨半掩扉主人留客意薄暮肯言歸

過箕子故城有感

柳暗荒城水滿渠幾家門巷帶邨墟井田已廢千年後

故壘曾經百戰餘果下更無三尺馬盤中時有八梢魚
遺封舊墓知何在試一停車問象胥

方向一首

向字與義桐城人成化辛丑進士授南京戶科
給事中以言事謫多羅驛丞後官至瓊州知府
有素亭集

桃源道中

桃源西望是辰州兩境中分五置郵
征旆影隨紅樹沒

斷橋水帶夕陽流
關山迢遞孤臣路
風物淒涼滿地秋
半世飄零竟何事
獨騎瘦馬重回頭

侯直一首

直字公繩松江華亭人
成化辛丑進士歷官廣西參議

夜集送楊君謙

馬蹄日日走紅塵
自怪微官繫此身
滄海煙波無限好
未歸真是不如人

鄭瑗一首

瑗字仲璧莆田人成化辛丑進士官郎中有省

齋集

獨不見

東飛伯勞西飛燕我所思兮獨不見
歲云暮矣多霜霰
日月推遷玄髮變
焚焚處廓誰與鄰
高山無蹊河無津
車粼粼馬駢駢
車馬縱橫徧城闉
獨不見意中人

邵寶六首

寶字國賢無錫人成化甲辰進士知許州入官

戶部歷郎中出為副使以副都御史總漕江北

再起巡撫貴州陞戶部侍郎終南禮部尚書卒

謚文莊有容春堂前後集泉齋勿藥集

李賓之云國賢

集該括情事摹寫景物極所欲言而無冗字長語

王濟之云

國賢古詩有魏晉之風師其意

不師其辭興寄閑遠體裁簡重

林待用云國

賢根幹宋儒標致秦漢莊以潔和以平紆徐容

與辨博而不肆

浦文王云先生詩謹重精結

得諸宋雄渾森嚴得諸唐爾雅深厚得諸漢

鍾伯敬云空同出天下無

真詩真詩惟邵二泉耳

詩話二泉詩如平原彌望雖
盡剪其荆榛惜少芳華可采

三一亭詩為俞吏科作

暇登西岡亭我懷樂共子有言感予衷千載猶仰止生
三事之一誰能不由此出為升堂由入為趨庭鯉廊廟
復江湖蒼生共憂喜俯仰天地間念念何時已所不盡
吾心有如此溪水

水北山莊圖歌

近來善學孟端畫眼中吾許張臨湘臨湘病後作此幅

樹色慘澹山蒼蒼水北山人好事者要我題詩惠泉下
秋林逝矣不可招臨湘臨湘亦其亞菊有黃華夜榻深
長吟偶坐吾玉林樽前擊節興未已誰能和以無絃琴
聽松菴裏廬山壁少日相看眼雙碧酒酣且作山人歌
莫向山僧問疇昔

夜坐有懷浦文玉

哭子身仍病懷君我亦傷江湖秋欲老風雨夜初長鶴
夢蘼汀遠蛩聲草砌涼蒹葭空獨賦愁絕不成章

雞鳴山

鍾山西引一峰高，雲磴盤紆步不勞。
畫裏樓臺自鐘鼓，望中城市有林皋。
江流入海初奔放，世路懷人更鬱陶。
却倚崔嵬發長嘯，松風何處起秋濤。

孟城卽事

孟城驛前吟夕陽，高郵湖上好秋光。
紅分菡萏初經雨，綠滿蒹葭未受霜。
遠浦有波長浴鷺，近隄無路尚垂楊。
南來時見吳江櫂，却倚船窗問故鄉。

乞終養未許

乞歸未許奈親何帝里風光夢裏過三月春寒青草短
五湖天遠白雲多客囊衣在縫猶寄驛騎書來字欲磨
聖主恩深臣分淺百年心事兩蹉跎

喬宇六首

字宇希大山西樂平人成化甲辰進士授禮部
主事轉吏部歷員外郎中遷太常少卿光祿卿
陞戶部右侍郎遷左侍郎出為南京禮部尚書

改兵部尋拜吏部尚書加少保兼太子太保卒

謚莊簡有克蒙豪

王元美云喬希大如漢官出臨遠郊亦自粗具威儀

詩話莊簡詩有雄策當時與邈李實為唱和交顧華玉叙其紀行之作謂正者準雅則奇者挾幽險是不特功存社稷亦風雅之領袖也

送甕山偶遇潘南屏

朝日散林薄鐘聲出翠微青山面湖立白鳥背人飛勝地不常有幽期能久違會逢高士話相對欲忘歸

秋風亭下泛舟

荒亭寥落野雲空
漢武雄才想像中
簫鼓橫流

一作開
應聲

畫鷁帆檣飛影動
晴虹山分秦晉羣
峰斷水入河汾兩

派通少壯幾時還
老大不堪

一作
須

回首歎秋風

登天同城樓

東南山勢遶皇都
西北樓高眺望孤
荒磧平沙連塞遠
片雲寒雁入空無
長城萬里卑秦築
文德千年仰舜敷
今日北門誰鎖鑰
受降城外盡輿圖

幕府山

說著看山興欲飛
湖西雙逕踏霏微
寧辭九日登高會
況是諸軍奏凱歸
林外鐘聲開宿靄
江頭帆影送斜暉
亦知歡會何終極
霜露休教上客衣

懷張南園

六詔山川萬里餘
秋來長恨賦離居
雁歸不過衡陽去
何處逢人好寄書

寄劉南坦司空

江上青山多白雲
秋來離思日紛紛
別來擬鼓中流櫂

采得芙蓉一贈君

蔡清一首

清字介夫晉江人成化甲辰進士歷官南京國子監祭酒卒贈禮部侍郎萬厯中詔特祀於鄉

追謚文莊有虛齋文集

林見素云介夫詩文別出體格擬人心而繁名

教卒澤於仁義道德粹如也

別鄒汝愚謫雷州吏目

識君未三月別君遽萬里吾豈小丈夫淚落不能止

范遵

甫云言

簡意長

王雲鳳三首

雲鳳字應韶遼州和順人成化甲辰進士除禮
部主事劾太監李廣下獄降知州陞陝西提學
僉事歷副使按察使召為國子祭酒以右僉都
御史巡撫宣府有博趨齋豪

詩話虎谷與王恭襄喬莊簡齊
名號河東三鳳頗留意吟詠

古意

中夜有所思所思君不知春風吹露草秋風吹霜枝所以別離人悠悠負心期別離非所惜年華難再得只恐君來時妾已無顏色顏色既已非君寧無歎息

送孟仲平陝西屯田僉事

璽書初下建章宮諸將邊隅已望風秦甲連營金窟北漢屯分畝玉關東山蘊凍雪侵雲白水落寒巖繞澗紅聞道西羌今款塞莫留魏尚久雲中

送客

春濕蒸雲雨散絲飄飄游子別離時愁看陌上青青草
送盡行人總不知

儲 罐 七 首

罐字靜夫泰州人成化甲辰進士授南京吏部
主事歷郎中改北司考功陞太僕寺少卿進本
寺卿轉都察院右僉都御史歷戶部左右侍郎
改吏部卒謚文懿有駟野柴墟二集

顧華玉云
公詩冲澹

沈鬱兼晉
唐之風

詩話文懿掉鞅詞場與揚君謙徐子仁杜樞居
衿契君謙嘗題扇寄之文懿愛惜緘題字未開
視也一日子仁樞居過出扇作畫文懿因題詩
寄君謙云為惜緘題入手遲清風千里故人思
畫成一事知還欠封寄江南乞寫詩亦藝林韻
事也李獻吉叙倡和詩云予承乏郎署所與倡
和則揚州儲靜夫趙叔鳴無錫錢世恩陳嘉定
秦國聲太原喬希大宜興杭氏兄弟柳州李貽
教何子元慈谿楊名父餘姚王伯安濟南邊庭
實其後又有丹陽殷文濟蘇州都元敬徐昌穀
信陽何仲默其在南都則顧華玉朱升之其尤
也當日倡和文懿寔居其首及李何教行執政
欲加擯斥文懿以文章復古為國家元氣極其
扶植得不傾陷風雅蔚興斯人攸賴今之論詩
者鮮及之論世者所當表微也文懿卒於南都
在正德癸酉後三年歸柩海陵攢於墓舍丁丑

將墓啓視棺上生黝墨成繪畫文具畫家皴染之法前則奇石枯松旁出二篠莖葉咸備左則梅株夭矯稍著數花右如左而樹枝差短其文深入木理四方來觀詫為神異華玉為作靈徵記此事甚怪近靈壽傳去異撰有明異叢寶應劉禹峰撰史外叢譚探幽索隱獨此未載故附之識

席上賦史巽仲歸雲洞

悠揚滿洞中歸來不知處曉起語農人春田夜多雨却問洞中雲何時下山去

有懷

獨坐誰為伴清謠夜不眠懷人千里共看月幾回圓秦
塞連雲戍荆門下峽船歸程那可料依舊折津年

春晦贈別 二首

殘春餘幾日欲去且相留脈脈難為別
怱怱不自由天涯芳草路花外夕陽樓
誰道文園客新來賦倦遊病較芳時晚
春含晦日陰曉鐘人不寐舊雨客難尋
院濕蛛絲重庭虛鳥跡深平明有幽事
移竹滿西林

大房金源諸陵

奉先西下亂山侵澗道迴旋入暮林羊虎半存行殿跡
莓苔盡蝕古碑陰秋山春水風流遠大定明昌德澤深
却是宣和解亡國穹廬黃屋豈初心

望岐溝

野水荒煙沒斷橋欲尋遺老問前朝不因書記班師奏
未必岐溝定屬遼

老米店有感

層冰一夕塞河船記得攜家已十年鮭菜燈前誰共飯

月明行店一悽然

楊循吉一首

循吉字君謙吳縣人成化甲辰進士除禮部主事以病乞歸有松籌堂集

詩話君謙官儀曹人目為頗主事每稱病不出長官厭之人或勸之歸賦詩云鄙人自從三月來腹心久已病疲疲晨興至午尚不食夜枕呻吟睡尤寡有人謂我病如此何不抽身向林野一聞此言即再拜誰有愛人如此者久知山水淡有味漸覺功名輕可舍乘今秋事天漸涼定買扁舟向南下遂疏請致仕沈啓南聞其歸賦詩云都門祖帳百花飛多見龍鍾賦式微較取

柳條千萬折不曾送一少年歸是時君謙年僅三十有一也其後康陵南巡為伶人臧賢所薦冠武人冠見帝應制賦打虎曲稱旨恒在御前填詞與俳優雜處乃謀於賢請急放歸其論詩曰詩不當以格律體裁為論惟求直吐胸懷實叙景象婦人小子皆曉所謂然後定為好詩其他鉅釘攪族拘拘拾古人涕唾者亦木偶之假綫索以舉動者吾無取焉故其詩多俚近然如陽山大石一篇賦情傲兀用韻妥帖非讀破萬卷書不能作也君謙好蓄異書孜孜不及題書厨詩云吾家本市人南濠居百年自我始為士家無一簡編辛勤一十載購求心頗專小者雖未備大者亦略全經史及子集一一義貫穿當怒讀則喜當病讀則痊恃此用為命縱橫堆滿前當時作書者非聖必大賢豈待開卷看撫弄亦欣然奈何家人愚心惟財貨先墜地不肯拾

斷爛無與憐朋友有讀者悉當相奉捐勝付不
肖子持去將鬻錢又鈔書詩云沈疾已在躬嗜
書猶不廢每聞有奇籍多方必羅致手錄兼買
人恒輟衣食費往來遠案行點畫勞指視成編
亦艱難把玩自珍貴家人怪我癖既官安用是
自知身有病不作長久計偏好固莫捐聊爾從
吾意是時吳中藏書家多以秘冊相尚若朱性
甫吳原博閻秀卿都元敬輩皆手自鈔錄今尚
有流傳者實
君謙倡之也

詠陽山雲泉菴太石奉和諸公同游聯句之作

偉哉此陽山有石俟歌誦形將冰塊截勢與蓮花共仰
觀一何高登涉不可輕鳥飛必徊翔雲出自騰瀟孤員

外成嶠空朗中含洞瘦如辟穀良清若食蚓仲深思殆
天設乍至令人恐濃蘿作垂陰寒泉滴為凍戴菴亦顛
危攜觴更交綜耳脇或駢攢勤拳時獨送巍巍上少並
森森下多從荒厓始誰開倒樹諒非種在茲三吳間當
以九鼎重崇巖借冠冕卑巒聽提控勞呼援固匿被壓
松堪訟曲躬始得門側身還入衙拂苔劣容眠收乳兼
資用志猶記秦餘材曷遺禹貢立久氣濕袍嘯高聲答
甕論年越殷周言時晦唐宋一為佛者居永作游人奉

病宜謚著史寐稱搏養永四方傳不誣諸公評切中臨
谷足還酸乘顛目偏縱支頤詎厭看極口難竭諷鬼鑿
手須胼鯨負背應痛東岱徒小魯西華繆推雍懸磬風
發鳴香爐煙結供曝沙伏靈黿食岡停遠鳳是知隆拔
羣所貴秀合衆偷餘殿容穰就隙亭閣棟枯藤蔓穿竅
長蛇舌撩縫輕盈受指彈玲瓏脫泥壅蒂拜本無忝羽
撼爭得動栽培稀尺閑構架靡寸空炎伏涼自生清秋
月堪弄林深必賴燭嵐酷能作鬣星光猶立芒龍吟殊

叶磻嶺獅馴已賓阜虎寧敢闕久嗟隅勝賞頻勞落清
夢即欲營終棲其奈懷微俸

鮑楠一首

楠字良用歙縣人成化甲辰進士官南京戶部

員外郎有龍山集

舟中

野渡溶溶春水夕陽點點寒鴉歛乃數聲何處行人一
擢天涯

祝萃一首

萃字維貞海寧人成化甲辰進士歷官陝西提學副使有虛齋遺集

紀行

訪舊指攜李擢出武原谿亭午歷璵城燠焉如春熙舟人共裸裎愛此南風吹老夫厄蓬櫳默坐心獨疑雲雨易翻覆變態不可知戒言避中流沿涯沂清漪屏翳忽四合飛廉驟如馳艦首屢低昂怒波揚其威所幸誕登

岸危致檣櫓摧顧彼隣舟人哀哉沈鷗夷古云行路難
此語良不非相望不百里尚爾逢顛危而況千里程能
保無嶮巇裁詩紀所遭進退宜知幾

費宏一首

宏字子充鉛山人成化丁未賜進士第一累官
少師兼太子太師吏部尚書華蓋殿大學士贈
太保謚文憲有鸞湖摘橐

有感次韻

妖孽纔消一戰收，猶煩禁旅扈宸遊。
皇人縱有瑤池樂，野老翻深杞國憂。
極北五雲瞻帝座，淮南千里候龍舟。
秋風忽漫悲搖落，鴻雁嗷嗷在荻洲。

詩話文憲在康陵時以守正拒寧庶人此詩因南昌已平而康陵猶南征而作也

石

瑤八首

瑤字邦彥藁城人，成化丁未進士，改庶吉士，授
簡討，歷修撰，侍讀學士，遷國子祭酒，陞南京吏
部侍郎，改禮部，尋掌翰林院，陞禮部尚書，轉吏

部入直文淵閣進武英殿大學士加少保兼太

子太保卒贈太保謚文隱更謚文介有恒陽集

李賓之云邦彥詩詞皆中矩度而七言古詩尤
超脫凡近衆所不及 王元美云石少保如披

沙揀金時

時見寶

詩話少保爰立在永陵初年是時諸臣以議禮
忤旨帝初欲援以自助而鯁直自守至三封內
批帝心弗善也故雖位列中台其詩多塞產而
不釋如云黽勉二十年十事九失意又云人生
值命薄所遇多不平又云雖云日偃仰亦復成
局促又云趾發物已迂意行悔相連又云軒冕
豈不華一喜生衆惕又云幡幡鳴春鳥解使朝
變昏又云古來忠與邪往往激褊淺又云苟移

造化柄貴土亦易崇又云寧為白壁碎不作脂
與韋寧為鈍劍折不作鉤與錐又云事去朝露
空安辨窮與達又云成語日紛紛君臣互相諛
但聞都俞聲無復咈與吁又云終然千古下忽
有知己歎蓋當日綸扉之間未盡和衷之雅一
傳衆咻誰與為善乃知人生不得行胸懷雖作
相與不遇等也近見東南文士有推少保詩為
北方之冠者又或謂得長沙之指授但未盡然
其詩頗類明
初西江一派

送邵國賢分韻

君帆已南下僕念日旋軫豈謂萍水分如失繩與準平
生東朝歡肝膽屢得盡曠然趨大塗一笑破畦畛鉅

用不微多士宜汲引誰撞待問鐘虛徃歸必稠吾聞凌
霜幹乃自階下筍願培正直姿出身濟時閔

雜詩

皎月邈中天清光照無極秋毫森可數萬里經一拭寧
知黑水潭其下深莫測龍蛇方蚴蟉行者為惻惻

春日雜言

長空多浮雲微雨霑四郊美人隔蘭渚雜佩不可要去
年梁間燕今歲將尋巢時物各芬芳吾興亦飄飄

秋蓮曲

西塘菡萏初破紅
小舟蕩漾東南風
羅裙曳水蘸輕碧
驚起沙頭雙落鴻
昨日采蓮蓮尚好
今朝采蓮蓮已老
綠房結子空垂垂
翠黛朱顏可長保
江頭日暮生嫩寒
鴛鴦雙飛不過灘
回頭女伴各無語
淚灑銅仙承露盤

芟田行

芟田復芟田
短刀長柄颼颼然
開鎌先芟三百束
村後村前轟陸續
南風吹場場土乾
烏犍載車角聲棘
去年

種麥麥不成今年麥熟家無贏為語農夫合勤儉汲水
聊春麥仁飯

春渡滹沱

世路無閒日風波歲歲新東風沙上雁落日岸頭人去
國曾千里還家又一春林花應笑客夏病往來頻

六言

密雲欲雨不雨繁杏將開未開日暮小樓凝望江南燕
子歸來

會昌宮詞

羽節貂裘謁內庭
太和公主髮初星
御前細說和番事
六院都來墮淚聽

蔣冕一首

冕字敬之全州人
成化丁未進士累官少傅兼
太子太傅戶部尚書謹身殿大學士
贈少師諡文定有湘皋集

湘山寺

孤墪湧山腰鐘聲隔煙樹朝暮見雲飛不見雲歸處

毛紀一首

紀字維之掖縣人成化丁未進士選庶吉士授
簡討歷修撰侍讀左諭德陞學士遷戶部侍郎
拜禮部尚書入直內閣進少保兼太子太保吏
部尚書謹身殿大學士卒贈太保謚文簡有鰲
頭類橐

武宗皇帝挽歌

玉輦今何處宸遊事已空淚多湘水竹悲切鼎湖弓汗
簡千年後鈞天一夢中空餘舊戎帳金甲凜霜風

陸完一首

完字全卿長洲人成化丁未進士累官太子太
保吏部尚書坐納宸濠賄論死議平劉六等功
戍泉州籍其家有水村集

題夏禹王長江萬里圖

雲山蒼蒼江漠漠紹興年間夏珪作珍重須知應制難

卷尾書臣字端恪却憶當時和議成偏安即視如昇平
惟開緝熙較畫史兩河淪棄無人爭斯圖似寫南朝土
還有樓臺在煙雨釣叟樵翁不可呼漁舟野店誰能數
但覺層層境不同林泉到處生清風意遠筆精工莫比
只許馬遠齊稱雄中原殷富百不寫良工豈是無心者
恐將長物觸君懷恰宜剩水殘山也畫終思效一得愚
更把飛鴻添在圖願君且向飛鴻問五國城頭信有無

王鴻儒二首

鴻儒字懋學南陽人成化丁未進士由戶部主
事歷官吏部侍郎南京戶部尚書卒謚文莊

擬楊鐵崖小游仙詞 二首

方壺員嶠月初生海色如銀萬頃明一片彩雲當面墮
東華童子名飛瓊

一別良常歲月賒茅君相念寄瑤華五雲閣吏無人換
猶是當年蔡少霞

楊廉 六首

廉字方震豐城人成化乙未進士累官南京禮部尚書贈太子少保謚文恪有月湖集

詩話月湖詩派本白沙定山其言曰近代之詩大抵只守唐人矩矱不敢違越一步惟陳公甫莊孔暘獨出新格予好公甫詩既選注之好孔暘詩又選注之其論絕句云於宋得濂洛關閩之作於元得劉靜修於國朝得陳公甫莊孔暘因類成一帙名曰風雅源流其師心若是然其七言長篇頗具排磊之力五律亦以樸勝不盡類陳莊二公

過牖簡莫水部

陳牖密牖連一帶南船北船此關隘往年水小謹啓閉

十日五日牖邊待今年濟水偶然溢雪浪崩騰復砰湃
下如落井上登天三老無功神是賴誰移兩山作一門
管束千流與萬派當初本為蓄水設豈知水大亦為閼
世間未有無弊法十利未免兼一害人言月河且緩築
不然水勢無由殺征夫自是懷往塗見月望弦今已再
履霜又恐阻冰凍帝鄉尚在紅雲外噫嘻水大莫怨遲
還勝從前水小時

往年得常山徐生惠硯甚佳丁未會試為監場軍

士持去自後所得硯皆不及之偶然追憶成古風

一篇

常山硯多青紫色不徒發墨仍潤澤憶嘗過市親閱來
惡者堆塵美藏匿再三苦索始出之坐賈乃邀三倍息
徐生簡選持贈予獲之如獲琮與璧硯今亦視為我用
口不能言似對臆南宮攜去戰文場螳垤蜂房專一席
風檐交卷出門去竟為守舍軍士得脣焦口燥呼不還
亟欲往追天已黑歸來旅邸不成眠反覆思維良可惜

當時妄意復得之焚香叩易揲著策得夬之革觀繇辭
莫夜之戎即斯賊欲將此事白有司姓名無處稽尺籍
三衢舊穴尚可尋巧匠斲山盈左側猶傳上品多更多
紫袍玉帶殊輝赫雖然此特一物耳吾輩何為置欣戚
但恨珍奇失所遇此意英雄或能識

折桂寺

境豈浮屠勝東南秀此峰澗流千丈瀑崖長萬年松少
室留蒼鹿番君見小龍布鞵從此製雲嶠寄遐蹤

哭鄒汝愚

海舶傳消息傷心遂不還死同鄒別駕窮過蔡西山絕
識何由得英風竟莫攀惟餘前日疏傳寫遍人間

直科口占

南科自分一枝安北轉惟添待漏寒吏事兩京終是少
諫官直恐是閒官

題曹憲副采蓴卷

三泖秋霖浸四圍水邊未覺露葵稀金盤玉箸長安客

幾得西風為汝歸

吳儼一首

儼字克溫宜興人成化丁未進士改庶吉士除
編修歷官侍講學士終南京禮部尚書謚文肅
有集

齒落

我年六十一已落第三齒若更活數年所存知有幾譬
若建重門一扉常自啓外侮窺其間孰禦而能止又若

築長堰隙穴不容蟻今已決尋丈不竭安肯已或言死
與生其機不在此此雖釋吾憂終焉非至理憶我初落
時掩口含羞恥只今落已慣與不落相似作詩紀歲月
亦漫戲云爾

羅 玘一首

玘字景鳴南城人成化丁未進士改庶吉士除
編修歷南太常少卿吏部右侍郎贈禮部尚書
謚文肅有圭峰集

寓言送李希賢

山僧下山時僧送不出山但問下山僧此去何時還乳
水閒一孔白雲留半間祇恐僧還少僧還誰閉關

李堂一首

堂字時升鄆縣人成化丁未進士累官工部右
侍郎總理河道有堇山集

堇山莊雜詠

紅葉亂紛紛秋光到小村莫憐蒲柳脆幸與菊松存
猿

狢貪山果牛羊戀華門石林涼不寐流水激籬根

夏 簇一首

簇字德樹天台人成化丁未進士官南京大理
寺評事有赤城集

廣陵

九曲池亭龍氣消誰家水調共蘭橈眼前亡國無多恨
江水東邊是六朝

蘇 葵一首

葵字伯誠廣州順德人成化丁未進士改庶吉
士授編修出為江西提學僉事改四川終福建
右布政使有吹劒集

金陵寄故園諸子

霜冷天空一雁飛鳳皇臺上幾霑衣一燈夜雨人無恙
萬里秋江夢獨歸醉客酒壚隨處好驚心人事異鄉非
明朝又發金陵道搔首長吟對落暉

周旋一首

旋字克敬慈谿人成化丁未進士以兵科給事中出參廣藩有西溪小橐

暮景

斜陽含霽景江上去人稀垂老猶為客經冬未授衣僧鐘和月起漁火隔煙微故國雲霄外多從夢裏歸

楊子器五首

子器字名父慈谿人成化丁未進士知崑山高平嘗熟三縣擢吏部考功主事進驗封郎中出

為湖廣參議歷河南左布政使有柳塘先生遺
藁

詩話名父早朝詩多至三百首其終篇云除却
早朝無一事更從何地效馳驅可想見承平景
象矣排節宮詞若落畫燈花風定後移來樹影
月明初已判聖恩非我分不傳私語到人間詩
可以怨不其然乎至於春花將及九分九天氣
又新三月三則尋常百姓家皆可道之不類深
宮中
女也

早朝
五首

東方曙色未分明玉陛千官接武行華蓋殿開鑾駕出

部頭天樂一齊鳴

九重天上六龍飛御氣氤氲拂太微鳳閣西頭明月在
清光還照侍臣衣

風定天街玉佩和露華滿地溼緋羅更番奏對銀臺罷
聽得西班喚六科

仙漏迢遙隔絳霄兩行銀燭照趨朝鼓聲纔歇鐘聲動
不放朝官過御橋

曉風吹動角端旗仗外祥光繞赤墀忽聽殿頭宣內閣

獨承密旨退朝遲

文森一首

森字宗嚴長洲人成化丁未進士除知慶雲縣
擢浙江道御史建言廷杖回籍起南京太僕寺
少卿終巡撫江西右僉都御史

九日

三載重陽菊開時不在家何期今日酒忽對故園花野
曠雲連樹天寒雁聚沙登臨無限意何處望京華

沈山子云

語不在深
自然蘊藉

鄒智一首

智字汝愚合州人成化丁未進士改庶吉士坐
誣下獄免死謫廣東石城所吏目居四年得疾
暴卒有立齋遺集

詩話立齋以吉士建言請黜萬安劉吉尹直三
小人而進用王恕王竑彭韶三君子泰陵初政
不報既而萬尹被彈事去劉獨銜憾刺骨嗾其
黨攻吉中書人湯御史鵠辭連立齋及劉壽州
概李主事文祥董沔陽傑謂數人以詩酒相結
納互相標榜詆毀朝政概貽鵠書云夜夢一人

騎牛將墜鵝手挽之不仆又見鵝執五色石引牛就正道人騎牛者朱也以爲鵝將有扶持社稷之力法司周內坐以妖言惑衆律罪當死賴王端毅何文肅徐文靖諸公力持之得生而立齋遠謫化州千戶所吏目既踰嶺從陳文恭講學未幾夭折惜夫其獄中詩云人到白頭終是盡事垂青史定誰真夢中不識身猶繫又逐東風入紫宸誦者傷之至辭朝詩云望見衣裳只此時放臣逐客讀之尤爲悽斷

辭朝

雲韶聲靜拜彤墀轉覺心驚不自持
罪大故應誅兩觀網疎猶得竄三危
盡披肝膽知何日望見衣裳只此時

但願太平無一事孤臣萬死更何悲

傅珪一首

珪字邦瑞清苑人成化丁未進士累官禮部尚書兼翰林院學士贈太子太保諡文毅有北潭集

大寧僧舍

村外重關護原頭怪石蹲水聲來樹杪花影上山根寺古殘碑蝕僧貧破衲存俗塵銷不得何用訪柴門

周詔一首

詔字希正長洲人成化庚子舉人由嘉祥儒學教諭遷興府伴讀陞紀善食長史俸肅皇帝繼大統從入擢太常寺卿兼翰林院侍讀卒賜祭墓贈禮部右侍郎有歸吳和陶達意等集

詩話太常從龍舊學特拜清卿王耕原詩云漢文潛邸會風雲今日誰收第一勲夜半忽傳天上詔虎符新拜宋將軍殆為公而發也或云指陸武惠亦近是石文介作傳稱公因事納忠言多剴切使更延其年不知大禮之議作何折衷或未必為張桂等力持以致興獻立廟稱宗未

可定
爾


飲酒和陶

得時言或違人皆以為是失時言合道求全反致毀毀
譽何足憑窮達亦偶一作不徒爾前程殊渺茫且來醉羅綺

明詩綜卷二十九

謹案第四頁前五行按伯顏應作巴延但入詩平
仄不協姑仍其舊





總校官庶吉士

臣

張能照

校對官檢討

臣

龔大萬

謄錄監生

臣

李士勳